



Na Elder Carlos H. Amado
No te Hitu Ahuru

Te Mesia te Taraehara

Ua haamaitai te tusia [a te Taraehara] i te mau taata atoa, mai Adamu, te matamua, e tae noa'tu i te taata hopea.

Ua fanauhia e ua pohe Iesu Mesia, te Tamaiti a te Atua, i te huru taa ē mau. Ua ora e ua paari Oia i roto i te oraraa haehaa, aita te mau mea materia. Ua parau Oia no ni'a Ia'na iho, « e ana to te alope, e tauraa to te manu o te reva ; are'a te Tamaiti a te taata nei, aita o'na tuāroi » (Luka 9:58).

Aita hoē a'e faahanahanaraa, hoē a'e maitai, hoē a'e haafahiahiaaraa e aore rā hamani-maitai-raa no ô mai i te mau ti'a politita o teie nei ao e aore rā no ô mai i te mau ti'a faaroo i To'na tau. Aita atoa Oia i parahi i te mau parahiraa teitei roa a'e i roto i te mau sunago.

E parau ohie Ta'na i poro, e noa'tu â te nahoa rahi tei pee Ia'na, Ta'na huru taviniraa, o te haamaitairaa īa i te taata, hoē i muri mai i te tahī. Aita e nehenehe e tai'o i te mau semeio ta'na i rave i rotopu i te feia tei farii Ia'na ei Taata ta te Atua i tono mai.

Ua horo'a Oia i Ta'na mau apostolo te haamanaraa e te mana no te rave i te mau semeio « e rahi atu â » te ohipa Ta'na i rave (Ioane 14:12), aita rā Oia i horo'a ia ratou i te haamaitairaa ia faaore atu i te mau hara. Ua iria To'na mau enemi i te faarooraia Ia'na i te paraura e, « a haere, eiaha ra ia hara faahou » (Ioane 8:11) e aore rā « ua faaorehia ta oe hara » (Luka

7:48). Tei Ia'na ana'e te reira ti'araa mana no te mea, o Oia te Tamaiti a te Atua e no te mea Na'na e aufau atu no te mau hara atoa na roto i Ta'na taraehara.

To'na mana i ni'a i te pohe

To'na mana i ni'a i te pohe te hoē atu hiro'a hanahana. Ua taparu o Iaeiro rahi, te taata faatere i roto i te sunago, « e haere i roto i to'na fare ; E tamahine fanau tahi ho'i ta'na... e ua fatata i te pohe roa » (Luka 8:41–42). Ua faaroo te Fatu i ta'na taparuraa, e a haere ai ratou, tae mai nei te hoē tavini ia Iaeiro ra ma te parau e, « ua pohe roa to tamahine, atire, a haarahi te orometua » (Luka 8:49). I muri iho te tomoraa'tu i roto i te fare, ua ani Iesu i te taatoaraa ia haere i rapae, ei reira iho, rave a'era i to'na rima, e ua parau atura ia'na, « a ti'a ! » (Luka 8:54).

I te tahī atu taime, te ratere ra Oia na te oire no Naina, ua farerei Oia i te hoē tere hunaraa ma'i, e te ta'i ra te hoē vahine ivi no te pohe o ta'na tamaiti fanau tahi. No te ī o To'na aroha, ua tape'a a'era Oia i te ro'i hopoi ma te parau e, « e teie nei taata apî, a ti'a, te parau atu nei au ia oe » (Luka 7:14). I te iteraa ratou i te semeio, ua pii hua te taata, « e peropheta rahi teie i tupu iho nei i roto ia tatou nei, e ua hi'o

aroha mai te Atua i to'na taata » (Luka 7:16). E semeio rahi ho'i te reira no te mea ua haapapū a'ena mai te ti'a mana tivira i teie pohe e te haere ra ratou no te huna ia'na. Na roto i teie na feia apî e pitī tei faaho'ihia mai i te ora, ua papū maitai teie haamana-raa Ta'na e teie mana To'na i ni'a i te pohe, e ua maere roa te feia ti'aturi, e ua ri'ari'a roa te feia vahavaha Ia'na.

I te toruraa o te taime te mea faahiahia roa a'e. E taea'e e e tuahine o Maretā, Maria e o Lazaro, e mea pinepine te Mesia i te haere i ô ratou ra. I te faaararaahia mai Oia e te taata e ua ma'ihia o Lazaro, ua faaea Oia e pitī mahana na mua'e a tere mai ai e fararei i te utuafare. No te tamarū ia Maretā, ua faa'ite hua'tu Oia ia'na e, « tei ia'u te ti'a-faahou-raa e te ora, o te faaroo mai ia'u ra, pohe noâ oia e ora â ia » (Ioane 11:25).

I te aniraa te Faaora i teie feia oto i tatarahia te ofa'i mai mua mai i te menema, ua muhumuhu marū mai Maretā Ia'na e, « e te Fatu, ua hau'a i tena'na, o te ru'i maha ho'i teie » (Ioane 11:39).

Ei reira, ua faahaamana'o'tu Iesu ia'na ma te here, « aore au i parau atu ia oe e, i faaroo oe ra e ite oe i te mana o te Atua ? » (Ioane 11:40). E i te otiraa teie parau Ta'na, ua pii puai a'era to'na reo :

« E Lazaro, a haere mai i rapae.

« Ua haere maira taua taata i pohe ra i rapae » (Ioane 11:44).

No te mea e maha mahana te maoro to Lazaro i roto i te menema, aita faahou â ia e rave'a ta te mau enemi a te Tamaiti a te Atua no te haavare ite atu, no te faariro'tu i te reira ei mea faufaa ore e aore rā no te faahuru ē atu, e ua maamā a'era ratou e ua opua ino atura, e « mai taua mahana maira ratou i te tahu'araa i ta ratou parau taparahi ia'na » (Ioane 11:53).

Te faaueraa apî

I muri iho, ua faahanahana te Mesia ora e Ta'na mau apostolo, i Ierusalem, i Ta'na oro'a hopea no te Pasa, e ua haamau i te oro'a mo'a, ma te horo'a i te faaueraa ia here i te tahī e te tahī na roto i te taviniraa ma te aau tae.



To'na mauiui pohe i Getesemane

I muri iho, ei faa'iteraa faahiahia roa a'e no To'na here i te taata nei, e na roto i To'na hinaaro mau, ua haere mata'u ore Oia ma te mana'o papû i Ta'na tamataraa rahi roa a'e. I te ô no Getesemane, i roto i te vai otahi-roa-raa, ua mamae Oia i te mauiui pohe rahi, e ua tahe te toto na roto i te mau poa atoa. Ma te auraro hope i To'na Metua Tane, ua tara ê Oia i ta tatou mau hara e ua rave atoa i ni'a Ia'na i to tatou mau ma'i e ta tatou mau ati, ia ite e nahea e faaora ia tatou (hi'o Alama 7:11–14).

E aitarahu tatou Ia'na e i to tatou Metua i te Ao ra no te mea ua haamaitai Ta'na tusia i te mau taata atoa, mai ia Adamu, te matamua, e tae noa'tu i te taata hopea.

Te faautu'araahia e te faasatauroraahia te Faaora

I te otiraa To'na mauiui pohe i Getesemane, ua tuu Oia Ia'na iho i roto i te rima o te feia tei faahapa Ia'na. Ua hoochia Oia e te hoê o To'na mau taata, ua faautu'a-vitiviti-hia, ma te afaro ore e te ti'a ore i mua i te ture, ua punuhia te haavâraa e aita te reira i haere i

to'na hopea. I taua pô ra, ua faahapahia Oia i te hara faainaina Atua e ua faautu'ahia Oia i te utu'a pohe. No to ratou pohehae e to ratou tairoiro Ia'na—i te mea ho'i ua faa'ite papû atu Oia ia ratou e, o Oia te Tamaiti a te Atua—ua opua ino To'na mau enemi ia faautu'a'tu Pilato Ia'na i te utu'a pohe. E no reira, ua taui ratou i te faahaparaa faainaina Atua ei faahaparaa orure hau, ia pohe Oia na roto i te faasatauroraa.

E faautu'araa ri'ari'a mau Ta'na i mua i te mau ati Roma : inaha ua faao ratou Ia'na e ua tahitohito i To'na basileia pae varua, ua ha'uti

ratou mai te huru ra te faaarii ra Ia'na ma te hoē hei raau taratara, ua ta'iриhia Oia e te taime roa roa no To'na mamae rahi i ni'a i te satauro i mua i te taata, papū roa e, ua riro atoa te reira ei faaararaa i te taata tata'itahi e tamata ia faariro ia'na iho ei pīpī Na'na.

I te taime tata'itahi o To'na mamae, ua faa'ite te Taraehara o teie nei ao i te aravihī rahi ia haavī ia'na iho. Ua mana'o noa Oia ia haamaitai ia vetahi ē ; e ma te aau maitai e te mata marū, ua taparu Oia ia Ioane ia aupuru i To'na metua vahine, o Maria. Ua ani Oia i To'na Metua i te Ao ra ia faaore i te hapa a te feia i faasatauro Ia'na. No te mea ua oti Ta'na ohipa i ni'a i te fenua nei, ua tuu Oia i To'na varua i roto i te rima o te Atua, e ua hutu i To'na aho hopea. Ua ravehia te tino tahuti o te Mesia e ua tuuhia i roto i te menema e toru mahana.

Te ohipa a te Taraehara i rotopu i te feia pohe

Te hepohepo ra Ta'na mau pīpī i te oto rahi, te paruparu o te aau e te papū ore, to tatou rā Faaora, i roto i te tahi atu tuhaa no te faanahoraa hanahana a To'na Metua, te faarahi ra ia i Ta'na taviniraa ma te rave'a apī. I te maororaa e toru mahana, ua ohipa tuutuu ore Oia no te faanaho i te ohipa rahi roa'e no te ohipa no te faaoraraa i rotopu i te feia pohe. Ua riro taua mau mahana ra ei mau mahana ti'aturiraa rahi roa'e no te utuafare o te Atua. I roto i taua tere i reira ra, ua faanahonaho Oia i To'na mau taata haapa'o maitai no te hopoi i teie parau apī e te oaoa no te faaoraraa, ia ratou tei ore i fana'o i te faaroo i te reira e aore rā tei pato'i i te reira. I teie nei, e ti'a ia ratou ia fana'o i te rave'a no te iriti mai ia ratou i te tūfīraa, ia faaorahia ratou e te Atua, te feia ora e te feia pohe atoa (hi'o PH&PF 138:19, 30-31).

Te oho matamua no te Ti'a-faahou-raa

No te mea ua hope roa Ta'na ohipa i te ao varua, ua ho'i mai Oia i te fenua nei—e a muri noa'tu, ua tahoē To'na varua e To'na tino tahuti. Noa'tu ā ua faa'ite u'ana Oia i To'na mana i ni'a i te pohe, te faa'ite nei te papa'iraa mo'a no ni'a i te feia Ta'na i faaho'i mai i te ora hou To'na Ti'a-faahou-raa, e semeio noa te reira no te faaroaraa i to ratou ora ; ua pohe rā ratou i te hoē mahana.

O te Mesia te taata matamua tei ti'afaahou mai e tei ore i pohe faahou, te taata matamua tei farii i te hoē tino maitai roa e te mure ore e a muri noa'tu. Ei taata tei ti'afaahou mai, ua fā Oia ia Maria, e i te taime ihoa a ite ai oia Ia'na, haamori atura Ia'na. E ma te reo marū, ua faaara to tatou Taraehara ia'na no To'na huru apī e te hanahana : « Eiaha e tape'a mai ia'u ; aore ā vau i tae i ni'a i tau Metua ra » (Ioane 20:17)—e haapapūraa faahou teie no te oti-roa-rraa ta'na ohipa i roto i te ao varua. I muri iho, ua parau To'na reo i te haapapūraa o To'na ti'a-faahou-raa, e ua na ô Oia, « te haere nei au i tau Metua ra e to outou Metua ra, e i tau Atua ra e to outou Atua ra » (Ioane 20:17). E i muri iho i To'na haereraa i To'na Metua ra, ua ho'i faahou mai Oia e ua fā i Ta'na mau aposetolo ; « Ua faa'ite maira ia ratou i ta'na rima e i ta'na aoao. Oaoa a'era te mau pipi i te iteraa'tu i to ratou Fatu ra » (Ioane 20:20).

E ho'i faahou mai te Taraehara

Te faa'ite papū nei au e, e ho'i faahou mai te Mesia, e taa ē rā te reira i To'na haere-matamua-raa mai. E ho'i mai Oia ma te mana e te hanahana, apeehia e te feia mo'a parau-ti'a atoa e te haapa'o. E ho'i mai Oia ei Arii no te mau arii e ei Fatu no te mau fatu, ei Arii no te Hau, te Mesia ifafauhia, te Faaora e te Taraehara, no te haavā i te feia ora e te feia pohe. Ua here au e te tavini nei Ia'na ma to'u aau atoa e te pii nei au ia tatou ia tavini ma te oaoa e ma te hinaaro mau, e ia vai to tatou faaroo rahi Ia'na e tae noa'tu i te hopea. Na roto i te i'oa o Iesu Mesia, amene. ■

